



Nezavisni odbor  
Broj: 01-05-122-v/19  
Sarajevo, 01.07.2019. godine

**Bosna i Hercegovina**  
**Federacija Bosne i Hercegovine**  
**SKUPŠTINA KANTONA SARAJEVO**

**PREDMET:** *Informacija, dostavlja se;*

Poštovani,

Nakon što je Nezavisni odbor Skupštine Kantona Sarajevo na sjednici održanoj 12.02.2019. godine, dao saopštenje za javnost, vezano za donošenje odluke o prijedlogu godišnje ocjene rada policijskog komesara za 2018. godinu, Mevludina Halilovića - „nezadovoljava“, od strane policijskog komesara je napravljen niz neprimjerenih istupa u javnosti, putem medijskih portala, televizijskih gostovanja i printanih medija u kojima je iznosio neprimjerene tvrdnje u vezi sa navedenim. Istovremeno, „menadžment Uprave policije“ daje podršku policijskom komesaru dajući izjavu također na portalu klix.ba (dana 14.02.2019. godine). Navedene izjave i policijski komesar i „menadžment Uprave policije“ daju prije nego što je prijedlog ocjene uopće sačinjen od strane Nezavisnog odbora u pisanom obliku, niti je isti bio dostavljen adresatima koje tretira Zakon o unutrašnjim poslovima Kantona Sarajevo.

Istovremeno, policijski službenici i „menadžment Uprave policije“ potpisuju peticiju podrške policijskom komesaru, te organizuju okupljanje istih i „protestovanje“ ispred zgrade Vlade Kantona Sarajevo. Osim toga, isti su formirali i grupu podrške policijskom komesaru na društvenoj mreži „facebook“ na kojoj se poziva na puč Vlade Kantona Sarajevo, blokiranje Nezavisnog odbora sa rečenicom: „treba izaći i sve ih blokirati“, stavljanje slika članova Nezavisnog odbora, predsjedavajućeg Skupštine Kantona Sarajevo, zastupnika u Skupštini Kantona Sarajevo, kao i ministra unutrašnjih poslova Kantona Sarajevo i na kojoj se navodi „evo ih“. Na društvenoj mreži „facebook“, u pomenutoj grupi (između ostalog) se navodi: da su policijski službenici dobili zadatak kako treba da postupaju, da je sve unaprijed isplanirano i da je krajnji cilj da se policija stavi pod politički uticaj i da joj se ukine samostalnost, kako njihova borba tek počinje ko god na kraju bio šef policije i da će neko za sve na kraju morati odgovarati, da je vrijeme za „maksimalnu sindikalnu akciju“ - otkad je smjena policijskog komesara borba za sindikalna prava ?! itd. itd.). Napominjemo da je policijski komesar 19.06.2017.godine, donio Depešu broj: 02/PK-1-48/17 kojom se nalaže svim policijskim službenicima da se putem sredstava masovne komunikacije uzdrže svih postupaka koji su u suprotnosti sa odredbama Zakona o policijskim službenicima Kantona Sarajevo, Instrukcije o pravilima ponašanja policijskih službenika, Mministarstva unutrašnjih poslova Kantona Sarajevo i Policijskog etičkog kodeksa, kao i drugih propisa i pravila ponašanja.

Slijedom naprijed navedenog, a nakon što je Nezavisnom odboru dostavljena anonimna prijava vezano za gore navedenu grupu podrške policijskom komesaru na društvenoj mreži „facebook“, Nezavisni odbor je na sjednici održanoj 16.04.2019. godine, u vezi sa naprijed navedenim, postavio pitanje G-dinu Bašić Miloradu, Načelniku sektora kriminalističke policije, Rješenjem Vlade



Kantona Sarajevo broj: 02-05-13232-12/19 od 29.03.2019. godine određen za obavljanje dužnosti policijskog komesara. Isti je odgovorio da nema nikakvih saznanja i da nije informisan o grupi podrške policijskom komesaru na društvenoj mreži „facebook“, ali ukoliko Nezavisni odbor ima dokumentaciju, ista će biti prosljeđena Jedinici za profesionalne standarde. Nezavisni odbor je istakao da se tu ne radi samo o policijskim, već i o državnim službenicima i namještenicima. Dokumentaciju, odnosno anonimnu prijavu Nezavisni odbor je dostavio G-dinu Bašić Miloradu na dalje postupanje sa zaključkom da se nakon provedenih aktivnosti Nezavisni odbor informiše o ishodu istih.

Na sjednici održanoj 19.06.2019. godine Nezavisni odbor je razmatrao informaciju koja je dostavljena putem e-maila iz Uprave policije, a koja je sačinjena u službenim prostorijama Odjeljenja za unutrašnju kontrolu Jedinice za profesionalne standarde. Pod tačkom 3. navedeno je sljedeće, citt:

***„Anonimna predstavka grupe policijskih službenika koja se odnosi na osnivanje "Facebook grupe" - "Podrška komesaru" te oglašavanje policijskih službenika Uprave policije na društvenim mrežama, te javno komentarisanje rada, odluka i postupaka organa vlasti Kantona Sarajevo***

Sa navodima iz predstavke dana 24.04.2019. godine putem telefona upoznat je predsjedavajući Odbora za žalbe javnosti G-din Željko Mijatović, koji je nakon konsultacija sa ostalim članovima Odbora dao saglasnost da se otvori unutrašnja istraga.

Dana 10.05.2019.godine na 87. sjednici Odbor za žalbe javnosti Skupštine Kantona je zapisnički verifikovao pomenutu saglasnost.

U skladu sa planiranim aktivnostima, izvršena je i detaljna analiza dostavljenog materijala („anonimna predstavka sa priložima“), te je sačinjen spisak svih lica, odnosno imena sa čijih profila je u pismenoj formi ostavljen i objavljen komentar na društvenoj mreži "Facebook" u grupi "podrška komesaru" kojom prilikom je konstatovano da je ukupno 33 lica komentarisalo u pomenutoj grupi, od kojih par lica kao profilno ime koristi lažno ime, odnosno "pseudonim", kao npr. "Shaban Shalulic, "Edita Edita, Mirsad Mirsad i dr."

Isto tako sačinjen je spisak od 18 lica uposlenika Uprave policije MUP-a Kantona Sarajevo: A.H. (profil Be Aida), A.M., O.V., A.V., A.F., E.K., F.I. (profil Fado Mou), J.P.P., A.K., Z.V., H.I.,E.N., F.O., N.M., D.P.K., M.T., N.F., M.H. i E.P..

S obzirom da se radilo i o policijskim službenicima i namještenicima unutrašnja istraga je vođena protiv policijskih službenika u skladu sa odredbama Zakona o policijskim službenicima, dok se za namještenika vrše preliminarne provjere u skladu sa Pravilnikom o radu Jedinice za profesionalne standarde.

Unutrašnja istraga vođena protiv policijskih službenika je okončana ocjenom "OSNOVANA" protiv sedam policijskih službenika (O.V., J.P., A.M., A.V., A.F., E.K. i A.K.), zbog **lakše povrede službene dužnosti** iz člana 102. stav 1. tačka j) **“Druga činjenja ili nečinjenja koja su u suprotnosti sa odredbama propisa kojima je regulisan rad policijskog organa i policijskih službenika”** Zakona o policijskim službenicima Kantona Sarajevo (Sl. novine broj 38/18), zbog toga što su bez predhodnog odobrenja koje je propisano Zakonom o policijskim službenicima Kantona Sarajevo, u vremenskom periodu od 26.02.2019. godine do 21.03.2019. godine, na neprimjeren način javno komentarisali rad i odluke organa vlasti Kantona Sarajevo, pozivajući učesnike grupe na proteste i osporavanje donesenih odluka, što je u suprotnosti sa članom 5. Policijskog etičkog kodeksa za policijske službenike Uprave policije MUP-a Kantona Sarajevo (broj 02-326 od 19.12.2018.godine), kao i navodima iz depeša policijskog komesara Uprave policije



MUP-a Kantona Sarajevo broj: 02/PK-1-48 od 19.06.2017. godine i broj 02-47 od 20.12.2018. godine, kojima su naložene mjere, upozorenja i neophodna poštivanja propisanih pravila prilikom službene korespondencije, objave i kometarisanja tekstova na ličnim profilima otvoreni-registriranim na društvenim mrežama itd.

Preliminarne provjere koje se vrše protiv namještenika Uprave policije su još uvijek u toku zbog toga što pojedini namještenici koriste godišnje odmore, pismenima zahtjevaju dodatna pojašnjenja u pogledu neusklađenosti zakona i pravilnika i dr. (A.H, V.Z, i P.E) uz napomenu da se istraga za namještenike i provodi u skladu sa Zakonom o namještenicima organima državne službe u Federaciji Bosne i Hercegovine, a po pravilima Uredbe o pravilima disciplinskog postupka za disciplinsku odgovornost državnih službenika u organima državne službe u FBIH, koj između ostalog pored unutrašnje istrage predviđaju i postupak medijacije i druge postupke koji se imaju primjenjivati za namještenike.“

Razmatrajući naprijed navedenu informaciju na sjednici Nezavisnog odbora održanoj 19.06.2019. godine, polazeći od mogućnosti da Nezavisni odbor ne razumije proceduru u kojoj se donose odluke po okončanim disciplinskim postupcima, Nezavisni odbor je postavio pitanje G-dinu Miloradu Bašiću da objasni samu proceduru od podnošenja prijave do okončanja disciplinskog postupka. G-din Bašić je odgovorio da Jedinica za profesionalne standarde dostavlja prijavu Odboru za žalbe koji daje (ili ne daje) saglasnost da se provede unutrašnja istraga. U ovom slučaju, Odbor za žalbe je dao saglasnost i unutrašnja kontrola je provela istragu koja je okončana ocjenom "OSNOVANA" protiv sedam policijskih službenika (O.V., J.P., A.M., A.V., A.F., E.K. i A.K.), zbog **lakše povrede službene dužnosti**.

Nezavisni odbor je u posjedu rješenja broj: 02/PK-DL-16/17 od 03.10.2017. godine, na osnovu kojeg je policijskog službenika A.T., nakon okončanog disciplinskog postupka, disciplinska komisija oglasila krivim za **tešku povredu službene dužnosti** zbog toga što: „nije na odgovarajući način zaštitio svoj fb profil pod određenim pseudonimom na društvenoj mreži facebook, sa kojeg i na kojem su komentarisana dešavanja oko slučaja „Dženan Memić“, a što je u suprotnosti sa odredbama Zakona o policijskim službenicima Kantona Sarajevo, Policijskim etičkim kodeksom i Instrukcijom o pravilima ponašanja policijskih službenika Uprave policije Ministarstva unutrašnjih poslova Kantona Sarajevo, niti je blagovremeno obavijestio Ministarstvo unutrašnjih poslova Kantona Sarajevo da je došlo do zloupotrebe navedenog profila.“ Istovremeno, ovakvo ponašanje se kvalifikuje kao „ponašanje koje narušava ugled policijskog organa“ te mu se izriče „**novčana kazna umanjenja osnovne jednomjesečne plate za 20% na period od 4 mjeseca**“.

Na pitanje Nezavisnog odbora da li objave policijskih službenika na fb grupi „podrška komesaru“ predstavljaju ponašanje koje ne narušava ugled policijskog organa i da policijski službenici nisu dužni da se u svom privatnom i profesionalnom životu ponašaju na način koji neće štetiti ugledu Ministarstva u cjelini, G-din Bašić je odgovorio da on „**samo potpisuje rješenja koja mu se dostave**“ i da se u ovom slučaju se radi o „**kršenjima pravila ponašanja policijskih službenika po prvi put (ranije nisu disciplinski kažnjavani) i da im je to uzeto kao olakšavajuća okolnost te je iz tog razloga njihovo ponašanja okvalifikovano kao lakša povreda službene dužnosti**.“

Dakle, u navedenom slučaju uopće nije razmatrano ponašanje policijskih službenika niti posljedica koju isto proizvodi u smislu da objave na fb grupi „podrška komesaru“ itekako narušavaju ugled policijskog organa, nego se uzima u obzir da je to kršenje policijskog etičkog kodeksa, odnosno takvo ponašanje je suprotno odredbama Zakona o policijskim službenicima Kantona Sarajevo i isto se kvalifikuje kao lakša povreda službene dužnosti, što nije slučaj kod policijskog službenika A.T. čiji je fb profil zloupotrebjen od strane drugog lica, kod koga se također radi o kršenju policijskog etičkog kodeksa po prvi put, ali je njegovo ponašanje okvalifikovano kao „teška povreda službene



dužnosti“. Zbog naprijed navedenog, Nezavisni odbor je izrazio svoje nezadovoljstvo i obavijestio G-dina Bašića da će o istom obavijestiti Skupštinu Kantona Sarajevo.

S poštovanjem,



PREDSJEDNIK

Miroslav Kružik

Dostavljeno:

- Naslovu;
- Odbor za žalbe javnosti;
- Ministarstvo unutrašnjih poslova Kantona Sarajevo  
N/r Admir Katica, ministar;
- a/a.



web: <http://skupstina.ks.gov.ba>  
e-mail: [skupstina@skupstina.ks.gov.ba](mailto:skupstina@skupstina.ks.gov.ba)  
Tel: + 387 (0) 33 562-044, Fax: + 387 (0) 33 562-210  
Sarajevo, Reisa Džemaludina Čauševića 1

